

Trakā žēima. Ēš karta pu Naujū – veizont žemaitēškā

Vēituo pradiuos

Sveikē, vēsē skaitontējē.

Pasēlgau vēskuo, kas žemaitēška. Pamēslējau ē nosprēndiau prēsējungtē pri kraštietiu...

Staibē vērp, kēnklēš neatsēlēikt nu anū, šmuotieli bokštē, bet atkragēnau sava dailē kramelē ē nosprendiau – nier kuo koistēis, rēk jimtēis darba.

Dērbo ē gīveno Trakūs, gīveno ē dērbo tēn pat Trakūs. Rašau aple tou, kon matau, vuo veizous vēs da žemaitēškā. Dēdēlē nesioskēt, je kon netēp parašiau.

Sausē pērma – Naujē metā.

Vēsē takalē ēšmargintē pelkeliem. Baisē sunkē ēšvēngorioutē neēlēpos. Je nesgrebni ēsi, ta būtēnā i kuokē nuors vēina tekštēliesi. Griausmingā nosēteikēs dongos nieka gera nežad... No, ē nieka bluoga, pakol kas. Līg ē žēimuos vēdorīs, bet ēš anuos tik pavadēnēms belēkēs...

Kapt kapt mažē lašēlē, kāp par krēkšta. Anū neēveizietē, bet gali pajostē ont žonda švelnē nosēlēdosius ēš dongaus. Nematā, bet junti, anēj tēkrē... Stēngas Tas, kors dongu, ka mes vēsē palaimintē būtomem.

Sausē ontra – ēr viel i darba

Viel i darba, šventēs bēngies. Ēš tuos laimēs ē saulē pasēruodē, matītēis uorū prognoozēs apei līto negērdiejē. Bet če saulēs bieda...

Žmuonis ē tei atsēgava, kon tik besotinki, kuožnos pol glousnioutēis, pol bočioutēis, vēsē tik laimēs link, vēsē tik sveikēn...

Sausē pēnkta – pasnēga.

Ēdama šēndēin gatvē, traškont snēigou, kāp meškēns pasējotau – tuoki drūkta, tuoki dēkta, ka net žemē sten, ožlēpos ont anuos... Bet kumet pradiejē vēsē gožietē, krotietē ēš sava truobū, kuožna žingsni sekē tas pats gērgždous, traškous steniejēms. Neblēka juokē ēšskertēnoma.

Apēntās lēkau eilēnē, katra mēnotelē sosēreikšmēna, pamēslējē, esonti truopnesnē ož kētus (ale dēdēlē gers jausmos bova)...

Sausē šešta – pūga.

Uors balts. Vēsor viepotēnē. Snaigēs kēlst nu žēmē, miegindamas dongon pas Pondēivali prēsēbrazdintē. Tumet apētās pamažo lēdas link žēmēs, notūpdamas atkalnie, ē tēp makaloujēs, vadaluojēs. Dēdēlē sunkē besoprastē a kēlst, a lēdas...

Tas snēigs kāp patrakēs, teškas i mona dailēs akis, jokiuos tvarkuos, jokiuos kultūras, jokiuos pagarbuos žmuogou... Vēino žuodio – pūga.

Sausē septinta – šaltis.

Pāsaka. Dēdēlē dailos rīts, net alsoutē truopnē negali ēš tuo gražoma.

Dongaus švēisolīs paraudunavosēs apvadās. Tuoks drūkts, ka aukštā pakēltē nesogeb. Tēp ēr kībuo pakabints galē Trakū. Atruoda ožsēlētum ont dēdesnē oslanalē ēr so ronkelē pagluostitomi...

Pavēinēs snaigēs, kāp pleštekēs, gracingā plazdenas uorē. Vēsos gražoms šnervies ožstring... Tēp gražē, kad net ašaruotē pradēdi, šērdskaudis apjem...

Kol iki darba atgērgždiejau, vēsos tušos novarviejē...

Sausē devinta – pēnktadēinis, ēšēigēnēs tujau.

Romantēšks erdvies mažioks, mosintās, ēšpīlē akvarelē ont dongaus?.. Lēngvo puotepio anam gavuos dailē vaizdā. Gēli židra uozē, apguobta minkšto balto debesioko, katruo kraštelē blēzg švelnio geltuonio.

Veizi i dongo ē atruoda, ka matā, kāp tas erdvēnoks so pēnzelio darboujēs. Ēr tumet tuoks nabags pasējunti, būdams apatiuo. Tumet atsēmēni vāsara, kumet tas dailos dongos nosēlēd žēmā. Ap gaub žēmē gairē vasarēnē mēgla. Va, toukart pasēdāra tēp šēltā, tēp gerā...

Gerā monēj, ka torio tuokē lakē vaizduotē, nesošalsio žēima, nuors da tik sausis...

Tēp prasēdiejē Naujē metā Trakūs. Tuokio uoro, tuokiuom nuotaikuom...

Vuo pas jumis, skaitītuojē, kāp tuoms dēinuoms bova?